

■ TRIBUNA POLITICA

Chauma da las dunnas*

DA PETER PEYER,
CUSSEGLIER GVERNATIV

Oz ha lieu il di naziunal da chauma da las dunnas. Ils motivs èn multifars. Ed els pertutgan er e gist ils umens. Pervia da quai qua in extract dal «Ap-pel a la chauma da las dunnas», deliberà ils 10 da mars 2019 da la radunanza naziunala da chauma:

Nus vulain l'egualitad effectiva e nus vulain decider sezzas sur da nossa vita. Nus essan quellas che procurain per la lavur en chasa, per la lavur d'educaziun e per la tgira a chasa, Senza quai na pudessan nossa societad e nossa economia betg funcziunar. Nus essan quellas che ans occupain dal bainstar dals uffants e dals geniturs attempads e che als tgiran. Ma a nus mancan ils daners ed il temp.

Nus vulain la medema paja per ina lavur equivalenta. Nus vulain che la valur da las 'professiuns da dunnas' vegnia augmentada e ch'ellas vegnian salarisadas adequatamain. Nus vulain assicuranzas socialas che garanteschan nossa existenza. Nus vulain rentas che ans pussibiliteschan ina vita en dignitad, senza che nossa vegliadetgna da renta vegnia augmentada. Nus vulain relaziuns da lavur che ans garanteschan la vaira egualitad en la lavur pajada e betg pajada.



Nus pretendain ina politica economica che metta en il center la lavur da tgira pajada e betg pajada e che finanziescha quella. Nus vulain la reconuschienscha e la repartiziun gista da la lavur en chasa e da la lavur da tgira, in augment da lur valur e lur imputaziun ed en las assicuranzas socialas in congedi da maternitad pli lung, in congedi per geniturs ed in congedi en cas ch'ils uffants u confamigliars èn mal-sauns. Nus pretendain in servetsch public suffizient e gratuit per la tgira da noss uffants, per la tgira da noss umans pli vegls e da nossa vita.

Nus vulain metter ina fin a l'impunitad ed a la bagatellisaziun da l'abus sexual e pretendain in plan da prevenziun naziunal per cumbatter la violenza, cun il qual vegn er realisada la convenziun d'Istanbul. Violenza sexistica e sexuala duai vegnir reconuschida sco motiv d'asil.

Nus essan quellas, sur da las qualas i n'è scrit nagut en ils cudeschs d'istorgia, che vegnan menziunadas mo en parantesas en la publicitad ed en la politica furmada d'umens e per umens e che vegnan educadas da sa sut-tametter ad in stereotip da la «dunna» u che vegnan tegnidas davent da la pussanza.

Nus vulain che stereotips specifics per la schlattaina vegnian abolids en la cultura, en las medias, en l'educaziun ed en la reclama. Nus vulain occupar da nov il spazi public e la politica e survegnir quella piazza, da la quala nus avain il dretg, almain la mesadad.

Nus vulain lantschar ina debatta sociala davart quest sistem economic capitalistic, dal qual profita mo ina minoritad, entant che la maioritad da la populaziun da quest mund, en spezial las dunnas*, vegn explotada, viva en povradad ed entant ch'il clima è periclità.»

Jau giavisch a tut las dunnas ed a tut ils umens in 14 da zercladur 2019 impressiunant e ch'i na duria betg anc ina giada 28 onns fin ch'il cumond d'egualitad è ademplì.

La survista completa dal catalog da las pretensiuns datti qua:
www.frauenstreik2019.ch